

Módulo 2 · A arte de dar instrucións



DEPUTACIÓN
DE LUGO

A intelixencia artificial aplicada á Administración Pública

Unidade 2.2

**Prompts con contexto documental
para redacción administrativa e
resumo de expedientes**

Unidade 2.2. Prompts con contexto documental para redacción administrativa e resumo de expedientes

Punto de partida

Esta é a primeira práctica guiada do módulo. Os principios da U2.1 aplícanse agora a dúas tarefas ordinarias nunha oficina pública: redactar documentos administrativos e resumir expedientes. A novidade é que xa non se traballa só co prompt. Trabállase co paquete de contexto.

Nunha tarefa documental, a calidade do resultado depende de tres decisións previas:

- Que documentos se achegan.
- Que partes deses documentos son relevantes.
- Que instrucións recibe o modelo para usar eses documentos sen inventar nin mesturar información.

A unidade mantén unha idea de fondo: a IA pode acelerar lectura, borradores e síntese, pero a responsabilidade administrativa segue sendo da persoa que revisa, valida e asina.

Ao rematar esta unidade, o alumnado debe ser capaz de:

- Preparar un paquete de contexto documental antes de redactar ou resumir.
- Aplicar a estrutura de prompt da U2.1 a correos, informes breves, respostas a queixas e actas.
- Producir resumos executivos de expedientes longos mantendo fidelidade ao documento orixinal.
- Usar autoprompting para deseñar prompts adaptados á tarefa, ao modelo e aos documentos dispoñibles.
- Axustar o ton institucional con exemplos propios e prompting inverso.
- Identificar os puntos onde a verificación humana é imprescindible.

1. Preparar o paquete de contexto

Que é un paquete de contexto

O paquete de contexto é o conxunto de materiais que se dan ao modelo para unha tarefa concreta. Pode incluír:

- Documento principal: expediente, informe, acta, proposta, queixa, solicitude.
- Documentos complementarios: normativa aplicable, instrución interna, modelo anterior, cadro de datos.
- Exemplos de estilo: respostas previas, modelos de informe, comunicacións publicadas.
- Criterios de saída: destinatario, extensión, ton, formato e límites.
- Información que non se debe usar: datos persoais, anexos irrelevantes, borradores superados, documentación duplicada.

Preparar este paquete evita dous extremos:

- Pedir á IA que traballe sen información suficiente.
- Cargar todo o que existe e obrigar o modelo a separar o relevante do ruído.

Antes de escribir o prompt

Antes de redactar a instrución, cómpre responder cinco preguntas:

1. Cal é o documento principal?
2. Que documentos ou fragmentos son necesarios para enténdelo?
3. Hai datos persoais ou información sensible que deben retirarse?
4. Que estilo ou formato institucional hai que replicar?
5. Que debe verificarse ao final?

Esta preparación é tan importante como o propio prompt. Nun expediente longo, unha mala selección de contexto produce omisións, mesturas de conceptos ou énfases incorrectas.

O xusto e ben organizado

En enxeñaría de contexto non sempre é mellor chegar máis. O criterio é chegar o xusto e ben organizado. Se o expediente ten oitenta páxinas, pode ser máis útil indicar ao modelo que traballe cos antecedentes, informes e proposta de resolución ca cargalo todo sen guía.

Exemplo de instrución:

"Traballa cos documentos adxuntos. Para o resumo executivo, prioriza antecedentes, proposta de resolución, informes técnico e económico, prazos e riscos. Non inclúas anexos de trámite salvo que conteñan unha condición relevante."

2. Redacción administrativa con contexto documental

Para que é útil

A IA chega valor real en tarefas textuais de alta frecuencia:

- Correos electrónicos institucionais: acuses, citacións, respostas rutineiras e respostas a queixas.
- Borradores de informes técnicos breves.
- Actas de reunión a partir de notas non estruturadas.
- Comunicacions internas: circulares, instrucións e notas informativas.
- Respostas cidadás con información xa dispoñible.
- Adaptación de textos a ton institucional ou linguaxe máis clara.

Non debe empregarse para tomar a decisión, substituír criterio técnico, resolver conflitos xurídicos ou completar datos que non constan no expediente.

Fluxo de traballo en oito pasos

1. Identificar o documento que se quere producir.
2. Preparar o paquete de contexto.
3. Retirar ou anonimizar datos persoais e información non necesaria.
4. Definir destinatario, ton, formato e extensión.
5. Formular o prompt cos cinco elementos da U2.1.
6. Avaliar a primeira resposta: exactitude, ton, cobertura e ausencia de invención.

7. Iterar para corrixir problemas concretos.
8. Verificar manualmente datos, normas citadas, prazos, nomes e compromisos.

Este fluxo aplícase tanto a un correo breve como a un informe. A diferenza é o tempo que require cada paso.

Ton institucional e exemplos propios

O ton é o problema máis frecuente. As ferramentas tenden a producir textos correctos pero xenéricos. Para axustar o ton da entidade:

- Achegar dous ou tres textos previos da propia institución.
- Pedir que identifique as características do estilo antes de redactar.
- Indicar fórmulas que se deben evitar ou preferir.
- Usar un asistente personalizado con instrucións permanentes cando a tarefa se repite.

Prompting inverso aplicado ao ton:

"Analiza estes dous correos institucionais da nosa entidade. Extrae as características de estilo: saúdo, tratamento, lonxitude das frases, nivel de formalidade, peche e vocabulario. Despois redacta un prompt para que unha IA poida escribir unha nova resposta mantendo ese estilo, sen copiar frases literais."

Este uso é especialmente útil para replicar patróns propios sen depender de fórmulas xenéricas.

3. Autoprompting para tarefas documentais

Cando usalo

O autoprompting é útil cando a tarefa é importante, complexa ou repetible. En vez de improvisar o prompt, pedímoslle á IA que nos axude a deseñalo.

Funciona ben para:

- Informes recorrentes.
- Resumos de expedientes.
- Respostas a queixas.
- Comunicacións delicadas.
- Preparación de borradores con varios documentos.
- Creación dun asistente personalizado no Módulo 3.

Patrón específico para documentos

"Quero realizar a seguinte tarefa administrativa: [descrición]. Vou achegar estes documentos: [lista]. Antes de redactar o prompt definitivo, faime as preguntas necesarias para saber que documentos usar, que partes priorizar, que datos debo anonimizar, que formato necesito e que riscos debo verificar. Despois redacta o mellor prompt posible para [modelo/ferramenta], indicando tamén como debo organizar os documentos."

Se se sabe o modelo ou ferramenta:

"Optimiza o prompt para Claude Opus 4.8, tendo en conta que vou cargar tres documentos e quero unha resposta con referencias aos fragmentos de orixe."

"Optimiza o prompt para GPT-5.5, tendo en conta que quero un borrador final curto e unha lista separada de puntos que debo verificar."

"Optimiza o prompt para Gemini 3.1 Pro, tendo en conta que parte do contexto está en documentos e parte en URLs oficiais."

A revisión do prompt xerado

O prompt que devolve a IA non se acepta automaticamente. Debe revisarse:

- Está clara a tarefa?
- Está delimitado o contexto?
- Indica que non debe inventar?
- Pide formato verificable?
- Inclúe os puntos que deben revisarse?
- Evita expoñer datos persoais?

Autoprompting non é delegar a responsabilidade. É pedir axuda para formular mellor unha orde de traballo.

Recorda o aprendido na unidade anterior para mellorar os resultados obtidos cando utilizamos esta técnica: sobre o prompt que nos ofrezca como resultado a IA cando aplicamos esta técnica de autoprompting e co obxecto de obter un resultado aínda máis completo, recoméndase sempre realizar una nova iteración coa IA no mesmo chat, aplicando a seguinte instrución:

“Estás seguro de que este é o mellor prompt que podes darme tendo en conta o contexto que te dei e a documentación que te acheguei? Analiza de novo a miña petición, revisa o contexto e a documentación adxunta e dáme a resposta definitiva. Confío plenamente en ti para esta tarefa e se fas ben o teu traballo dareiche unha recompensa de 2.000 dólares, pero serás penalizado se cometes erros.”

4. Resumo de expedientes: método práctico

Por que a IA é útil nesta tarefa

O resumo de documentos longos é unha das tarefas onde a IA pode aforrar máis tempo, sempre que a verificación final estea prevista desde o inicio. O modelo pode facer unha lectura inicial, identificar apartados, extraer feitos, propoñer unha síntese e presentar unha estrutura. A persoa debe confirmar que esa síntese non omite nin altera elementos relevantes.

Fluxo de traballo para resumir un expediente longo

1. Determinar se o expediente pode tratarse coa ferramenta elixida segundo confidencialidade, protección de datos e condicións de uso.
2. Anonimizar ou retirar datos persoais non necesarios.
3. Separar documentos por tipo: solicitude, antecedentes, informes, proposta, anexos.
4. Decidir que tipo de resumo se necesita: executivo, por seccións, cronolóxico, de riscos ou para toma de decisión.
5. Formular o prompt indicando documentos, prioridade, formato e límites.
6. Pedir que a saída distinga feitos, valoracións e puntos pendentes.
7. Iterar sobre omisións ou confusións detectadas.
8. Verificar contra o expediente orixinal cifras, datas, nomes, prazos, informes e condicións.

Prompt base:

"Actúa como administrativo de secretaría con experiencia en tramitación local. Vas elaborar un resumo executivo dun expediente a partir dos documentos adxuntos. Contexto documental: Documento 1, solicitude; Documento 2, informe técnico; Documento 3, informe económico; Documento 4, proposta de resolución. Tarefa: redacta un resumo de 300 palabras para alcaldía. Formato: catro parágrafos: 1) que se solicita e por quen; 2) antecedentes principais; 3) informes emitidos e sentido de cada un; 4) puntos pendentes ou riscos. Ton institucional. Restricións: non inventes información; se algo non consta, escribe 'non consta nos documentos achegados'. Ao final, engade unha lista de cinco datos que debo verificar no expediente orixinal."

Ferramentas e contexto documental

As ferramentas que se traballarán no Módulo 3 teñen formas distintas de recibir contexto:

ChatGPT / GPT-5.5: permite traballar con ficheiros segundo o plan dispoñible e combinar instrucións, documentos e formato de saída. É útil pedir unha lista final de puntos de verificación.

Gemini 3.1 Pro e Gemini 3.5 Flash: poden traballar con documentos e, en contornos compatibles, con URLs como contexto. Gemini 3.1 Pro é máis axeitado para expedientes complexos, análise multimodal e razoamento longo; Gemini 3.5 Flash é preferible cando se busca menor latencia, volume de tarefas, fluxos axénticos ou produción a escala. A integración con Drive ou Workspace dependerá da conta e da configuración institucional.

Claude Opus 4.8 e Sonnet 4.6: axeitados para documentos longos e comparación de varias pezas. As funcións de citas de Claude permiten obter referencias a fragmentos de documentos cando están dispoñibles.

Ferramentas con respostas ancoradas nas fontes: útiles cando a prioridade é trazabilidade. NotebookLM é un exemplo e traballarase con detalle no Módulo 3. Nesta unidade interesa a metodoloxía: responder contra documentos, non contra memoria xenérica do modelo.

5. Limitacións e protección de datos

Limitacións de calidade

A IA pode:

- Omitir información clave se non se lle indica que a busque.
- Reformular cifras de forma imprecisa.
- Fundir conceptos próximos pero distintos.
- Dar máis peso a un anexo irrelevante ca ao informe principal se o contexto está mal organizado.
- Usar coñecemento xeral cando debería limitarse aos documentos achegados.
- Producir un ton convincente que oculte unha omisión.

Para reducir estes riscos, o prompt debe incluír sempre unha instrución de fidelidade:

"Basea a resposta só nos documentos achegados. Se falta información, indícao. Non completes lagoas con coñecemento xeral."

Protección de datos

Nunca se introduce ningún dato que identifique ou poida identificar a un cidadán nunha ferramenta gratuíta de uso público. Esta regra deriva do RXPd e da normativa de protección de datos.

Tres niveis prácticos:

- Conta persoal gratuíta: non apta para datos persoais nin información interna sensible.
- Conta de pago individual: só para información pública ou correctamente anonimizada, segundo condicións contractuais.
- Licenza corporativa ou enterprise: pode ser apta para datos reais só despois de validación xurídica, contrato e garantías de tratamento.

Anonimizar non é só borrar o nome. Tamén poden identificar un DNI, enderezo, teléfono, número de expediente, profesión, barrio ou combinación de datos.

Exemplo aplicado

Un administrativo da secretaría dun concello recibe un expediente de 45 páxinas sobre unha cesión gratuíta de uso dun local municipal a unha asociación cultural. Ten que preparar un resumo executivo de 300 palabras para alcaldía.

Paso 1. Prepara o paquete de contexto:

- Solicitude da asociación.
- Informe técnico sobre o estado do local.
- Informe de intervención.
- Proposta de resolución.
- Ordenanza ou norma interna aplicable, se existe.

Paso 2. Anonimiza nomes de socios e datos persoais non necesarios.

Paso 3. Usa autoprompting:

"Quero resumir un expediente de cesión gratuíta de uso dun local municipal. Vou achegar solicitude, informe técnico, informe de intervención e proposta de resolución. Antes de redactar o prompt definitivo, faime as preguntas necesarias para organizar o contexto e evitar omisións."

Paso 4. Coas respostas, executa o prompt final:

"Estás a producir un resumo executivo dun expediente de cesión gratuíta de uso dun local municipal a unha asociación cultural. Destinatario: alcaldía. Documentos achegados: solicitude, informe técnico, informe de intervención e proposta de resolución. Lonxitude: 300 palabras. Formato: catro parágrafos. Contidos por orde: 1) que se pide e por quen; 2) termos principais da cesión; 3) informes emitidos, indicando o sentido de cada un; 4) puntos pendentes ou riscos. Ton institucional. Basea a resposta só nos documentos. Se algo non consta, indícao. Ao final engade unha lista de datos que debo verificar."

Paso 5. Revisa referencias, período de cesión, contraprestación, informes citados e condicións.

Paso 6. Itera:

"O terceiro parágrafo mestura os tres informes. Sepáraos en tres frases distintas, unha por informe, indicando se é favorable, condicionado ou desfavorable."

Paso 7. Entrega o resumo como produto asistido por IA e verificado pola persoa responsable.